

GABRIEL RAMOS URANGA (1939-1995)

Euskaltzaindiko egoitza honetan gaudenok, gabiltzanok eta datozen bisitari guztiek jakin dezaten, 1991n jarri ziren bi beirateak Gabriel Ramos Uranga pintore eta grabatzaileak eginak direla nonbait konstaraztea komeni dela eta, hil berria den artista honi oroipen eta omenaldi gisa aitortzen diogu gaur. Euskal Herrian arte eta teknika aldetik koloreetan grabatzaile onena zela eta agindu zitzaizkion bi beirate horiek egitea. Proiektua kolorez marraztua ikusi genuenean konturatu ginen aurkeztutakoak zeukan edertasun, indar eta sinbologiaz. Hamazazpi metro karratuko beiran ematen zigun Euskaltzaindiaren sinboloa, arbola, haritza, baina orri solteetan bilakatuta. Gure Instituzioa hilezkorra dela adierazteko, berde desberdin eta aberatsekin asmatu zituen orriak, oraingo euskaltzainen ondoren orri berde freskoak beti etorriko direlakoan. Jose Maria Uzelai izan bazen gure arbola eta belarren berde desberdinak isladatzen ahalegindu zena, beste horrenbeste egin zuen Ramos Urangak gure bi beirateetan.

Gabriel Ramos Uranga, adiskide izatera heldu ginenontzat *Gabi*, Bilbon jaio zen 1939.eko irailaren 4ean eta 56 urtekin hil aurtengo abuztuaren 9an. Madrilen arkitektura ikasketak egiten ari zelarik, Arte Ederretako San Fernando Eskolara joan zen pintura eta grabaua ikastera. Azken bi hauetan eman zituen lanik oparo eta onenak, hainbat erakusketa prestatuz eta sariak irabaziz. Koloreetako grabauaren teknika Cuencan ikasi zuen, 1968an hasita, Henri Dechanet maisu frantsesarekin. Eta Euskaltzaindirako beirateak (eta Urkiolakoak ere) Cuencan beiratu zituen, Vitrea etxeari lana aginduz. Egoitza honen inaugurazio urtean, 1991.eko ekainaren 3an sinatu zen Vitrearekin hitzarmena eta hurbiletiik jarraitu zuen Ramos Urangak bertan lana gure egoitzan beirateak jarri arte. Eskaileraren gailurrean dagoen beirateak 2,9 x 1,7 metro ditu, eta solairu honetan dagoenak 6,15 x 2,6 metro. Ramos Urangari ordaindutakoaz aparte, Vitrea etxeari 3.743.936 pezeta ordaindu zizkion Euskaltzaindiak Aginteengandik jasotako diruarekin.

Gabriel Ramos Urangari eskerrak eta oroimena.

*José Antonio Arana Martija
Bilbon, 1995-10-27*